

de dar por la dicha renta, e pidiome por merçed quél proveyendole de remedio e de derecho mandase sobre ello, lo qual a mi merçed fuese e fallase por derecho, e yo tovelo por bien.

Porque vos mando, vista esta mi carta que dedes luego e paguedes luego al dicho Gonçalo Sanchez o al que lo oviere de aver por él los dichos veynte e mill maravedis que asy diz que protesto contra vos por la dicha renta en la manera que dicha es, bien e conplidamente en guisa que le non mengue cosa alguna, e non fagades ende al por alguna manera so pena de la mi merçed e de dos mill maravedis a cada uno de vos para la mi camara, pero si contra esto que dicho es, alguna cosa quisieredes dezir e razonar porque lo non demandedes de asy fazer e conplir por quanto esto es e depende de maravedis de las mis rentas e el dicho Gonçalo Sanchez diz que vos lo quiere demandar por ante mi en la mi corte, por ende el pleito e tal es mio de oyr e de librar, mando al ome que vos esta mi carta mostrare que vos enplaze que parescades ante mi doquier que yo sea del dia que vos enplazare a quinze dias primeros siguientes sola dicha pena e yo mandar vos he de oyr e librar con el dicho Gonçalo Sanchez como la mi merçed fuese e fallase por fuero e por derecho, e de como esta mi carta vos fuere mostrada, e los unos e los otros la cunplieredes, mando sola dicha pena a qualquier escrivano que para esto fuere llamado que de ende al que vos la mostrare testimonio signado cn su signo porque yo sepa en como conplides mi mandado, la carta leyda dadgela.

Dada en la çibdad de Segovia, diez e seys dias de Febrero, año del nascimiento del nuestro Salvador Ihesuchristo de mill e quatroçientos e siete años. E sy ovieredes de parecer en seguimiento de la dicha abdiencia pareçed por vuestro procurador sufiçiente. Pero Sanchez de Avila notario del Andalozia la mando dar. Yo Pero Ferrandez de Bivero escrivano del dicho señor rey la escrivio. Pero Sanchez Vista, Diego Nuñez. Registrada

XVII

1407-III-10, Segovia.— Juan II a Murcia ordenando que se realice el reparto del pedido. (A.M.M. Cart. Real 1391-1412, fol. 14r.)

Don Juan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; al conçeio, e alcalles, e alguaziles, e cavalleros, e regidores, e omes buenos, e otros ofiçiales qualesquier de la çibdad de Murçia; e a todos los conçeios, e alcalles, e alguaziles, e otros ofiçiales qualesquier de todas las çibdades e villas e lugares del obispado de Cartagena con el dicho reyno de Murçia; e a qualquier o a qualesquier de vos a quien esta mi carta fuere mostrada o el traslado della signado de escrivano publico, salut e graçia.



Sepades que en el ajuntamiento quel rey mi padre e mi señor, que Dios perdone, fizo en la çibdad de Toledo e en el mes de Dezenbre que agora paso estando ý con él el Infante don Ferrando, mi tio e mi tutor, e regidor de los mis regnos, e algunos perlados, e condes, e ricos omes, cavalleros, e escuderos, e los procuradores de las çibdades e villas e lugares de los dichos mis reynos para acordar las cosas nesçesarias que eran menester para la guerra de los moros e los maravedis que eran menester para la conplir e para pagar el sueldo a la gente de armas e omes de pie que en la frontera de los moros estan, e a la dicha guerra an de yr e para el armada de la flota de las naos e galeras que para la dicha guerra son menester, fue otorgado que pagasen luego de presente todos los de los dichos mis reynos quarenta e çinco cuentos de maravedis, la meytad en monedas e la otra meytad en pedido; del qual dicho pedido es mi merçed dé mandar fazer luego repartimiento de siete cuentos e medio de maravedis por todas las çibdades e villas e lugares de los dichos mis reynos, en el qual dicho repartimiento copo a vos la dicha çibdad de Murçia e a las çibdades e villas e lugares del dicho obispado de Cartagena con el dicho reyno de Murçia que aqui seran contenidas las quantias de maravedis que aqui dira en esta guisa: A vos, el conçeio de la çibdad de Murçia e vuestra tierra e vuestras torres, quarenta e siete mill maravedis; a vos, el conçeio de Molina Seca, diez mill maravedis; a vos, el conçeio de Hellin, ocho mill e quinientos maravedis; a vos, el conçeio de Tovarra, quatro mill maravedis; a vos, el conçeio de Chinchilla e vuestra tierra, veynte e ocho mill e quinientos maravedis; a vos, el conçeio de Montealegre, quinientos maravedis; e a vos, el conçeio de Albaçete con la Gineta, doze mill maravedis; a vos, el conçeio de Carçelen, doçientos maravedis; a vos, el conçeio de Xorquera, quatro mill maravedis; a vos, el conçeio de Alcalá, tres mill e quinientos maravedis; a vos, el conçeio de Vez, dos mill e ciento maravedis; a vos, el conçeio de Almansa, syete mill maravedis; a vos, conçeio de Yecla, tres mill e seteçientos maravedis; a vos, el conçeio de Pliego, quinientos maravedis; a vos, el conçeio de Havaniella, tres mill maravedis e quinientos maravedis; a vos, el conçeio de la çibdad de Cartagena, dos mill e doçientos maravedis; a vos, el conçeio de Sax, seysçientos maravedis; a vos, el conçeio de las Peñas de Sant Pedro, tres mill maravedis; a vos, el conçeio de Jumilla, dos mill e seteçientos maravedis.

Porque vos mando, que luego en punto vista esta mi carta, o el dicho su traslado signado como dicho es, syn otra luenga ni tardança alguna fagades repartimiento por todas las personas desa dicha çibdad e de las otras çibdades e villas e lugares del dicho obispado de Cartagena con el dicho reyno de Murçia asy esentos como non esentos, salvo cavalleros, escuderos, e dueñas, e donzellas, fijosdalgo de solar conosçido que es notorio que son fijosdalgo, e los clerigos que son de misa de orden sacra, que es mi merçed que non paguen en el dicho pedido porque me syrven en esta guerra apartadamente, en manera que del dia que vos esta mi carta fuere mostrada fasta terçero dia primero siguiente des repartidos los dichos maravedis que vos, la dicha çibdad de Murçia e las otras çibdades e villas e lugares del dicho obispado de Cartagena con el dicho reyno de Murçia avedes a dar, e los dedes cogidos e pagados del dia que vos esta mi carta o el dicho su



traslado signado como dicho es vos fuere mostrada fasta diez dias primeros syguientes a quien yo mandare o enbiare mandar por mi carta bien e conplidamente, en guisa que le non mengue ende alguna cosa. E los unos e los otros non fagades ende al por alguna manera so pena de la mi merçed e de seys mill maravedis a cada uno de vos para la mi camara, e de la privaçion de los ofiços que tenedes vos los dichos ofiçiales desas dichas çibdades e villas e lugares del dicho obispado e reyno, e demas sy lo asy fazer e conplir luego non quisieredes por esta mi carta o por el dicho su traslado signado como dicho es, mando al ome que vos esta mi carta mostrare que vos enplaze que parescades ante mi doquier que yo sea, vos los dichos conçeios, por vuestros procuradores, e uno o dos de los ofiçiales de cada lugar personalmente con poder çierto de los otros, del dia que vos enplazare fasta quinze dias primeros siguientes sola dicha pena a cada uno a dezir por qual razon non conplides mi mandado, e de como esta mi carta o el dicho su traslado signado como dicho es vos fuere mostrada, e los unos e los otros la conplieredes mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mi mandado.

Dada en la çibdad de Segovia, diez dias de Março año del nascimiento del nuestro Salvador Ihesuchristo de mill e quatroçientos e siete años. Yo Juan Bernal de Sevilla la fiz escrivir por mandado de nuestro señor el rey. En las espaldas de la dicha carta estavan escriptos dos nonbres que dezia: Antonio Gomez, Pero Ferrandez. Fecho e sacado fue este traslado en la villa de Chinchiella, veynte e siete dias de Abril año del nascimiento de nuestro Salvador Ihesucristo de mill e quatroçientos e siete años. Testigos que a esto fueron presentes que vieron e oyeron leer e conçertar este dicho traslado con la dicha carta e original del dicho señor rey onde fue sacado.

XVIII

1407-III-12, Segovia.— Juan II al obispado de Cartagena y reino de Murcia comunicando el nombramiento de Juan Rodriguez de Villareal como recaudador de las alcabalas y tercias. (A.M.M. Cart. Real 1391-1412, fol. 15r-16r.)

Don Juan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murcia, de Jahen, del Algarbe, de Algezira, e señor de Vizcaya e de Molina; a todos los conçeios, e corregidores, e alcalles, e juezes, e alguaziles, e regidores, jurados, e omes buenos e otros ofiçiales qualesquier de las çibdades de Cartagena e de Murcia, e de todas las villas e lugares del obispado de la dicha çibdad de Cartagena con el reyno de la dicha çibdad de

